

四庫全書

集部

欽定四庫全書

集部

元音遺響卷五

六

詳校官中書

臣丁榮祚

助教

臣

常循覆勘

總校官原任中允

臣王燕緒

校對官中書

臣孫球

謄錄監生

臣李炎

欽定四庫全書

元音遺響卷五

元胡布撰

五言律詩

隱居

十首

擾擾自不靜營營誰肯休
能閒非俗客入道鮮時流
浩氣乾坤塞高風海嶽秋
由來超世士自古在林丘

其二

安貧宜有素處世欲無言
拘束尊名教煩憂念庶蕃
衣

冠符道氣學行表儒門試與論消息流觀萬化原

其三

劉向青藜杖林宗折角中山川古莽國人物葛天民息
比穹林鳥游如活水鱗桃源人世上此處是通津

其四

坦夷敦樸素澹泊得閒情長日惟端坐窮年遂養生搏
風鵬翮起望月兔胎成倘有夸毗意毋勞勸耦耕

其五

行輕便草屨卧煖愛茆廬克已成儒行教人看道書雲
行天浩蕩春盎物舒徐彼此無殊致元元得自如

其六

否獨當危行幽貞謝衆紛見人如顧敵入獸不驚羣風
雨隨琴操星辰緯劒文囂囂塵世事漸覺耳無聞

其七

農桑千里接雨露四時調河海流通貫山川氣沈寥梅
花詩滿壁柏葉酒盈瓢莫怪踰垣去衣冠未可要

其八

不復趨人利方將恤我仁
閒應腴道味懶得任天真
溪水淨堪浴皋蘭香可紉
翛然成獨樂靜定瑩心神

其九

即水窮源滙探丸見括囊
綱常人道立匡廓世維張
凡翳淘虛晃天和貫混茫
昔年縈抱意胸宇淨毫芒

其十

習靜宜塵想觀心息動機
名言根體用至道徹淵微
美

利乾能事休傾否弗違永言貞遯吉茲理有攸歸

閒居 十首

功利誣前志畊蠶息此鄉年華忙裏迫日晷靜中長
山水窮雙屐風雲富八荒憑將千古意長嘯暮天蒼

其二

得法食蓬蘽無根養昔邪培金初長鑛種玉早成葩
顏色青精飯肌膚白乳花但能存靜嘿會自結丹砂

其三

野水通花逕迴流蔭果園游鳬如葉縣飛鶴自雷門澤
世勲名晚居閒道義尊此身同草木何有荅乾坤

其四

溪山隣勝迹樓觀接中台銀漢流雲散金天霽月來不
言均四序何德備三才自得天然趣幽懷萬古開

其五

柴扉芳草徧桂障小山幽月白吹簫夜天空倚杖秋乾
坤塵漠漠江海思悠悠只合將琴劍移家住沃洲

其六

助胃多烹术輕身久茹芝
昌陽根益壽雲母粉充饑
靈液滋金骨瓊漿漱玉池
乘風何所待莊列澹無為

其七

斗室寬天下虛中抱至仁
應酬能中節物我總熙春
海嶽增雄觀浮休寄眇身
不須矜白眼已是出紅塵

其八

遺珠探象罔煮土識長生
脈望仙經得驚精玉釜烹
士

惟崇至德道不貴虛名自有清明在非求外物成

其九

天葩開罨畫地籟鼓雲和夕嶂蕪空淨秋江得月多黃
金高武弁白屋守文魔俎豆尋常禮當時講幾何

其十

釀秫方充酒樵林始足薪入山無利路負郭有閒人碧
笈清都籍黃圖太古民祇應雲作伴慣得鶴隨身

遷居雜興

十首

野艇隨流水長天際落霞江湖塵外靜穹壤望中賒石
鼎翻茶穀陶樽汎菊花飽諳山澤僻畊種在雲涯

其二

岸閣紫雲深山扉綠柳陰水風醒醉眼溪月洗塵心天
道從消長人寰遞古今平生知此意不復計升沈

其三

桃竹緣臯堞檉蘿蝕礧梁柳垆金散縷梅甸玉飄香生
殖山中富豪華世上狂那知垂釣者心事付滄浪

其四

種藥宜巖竇澆畦有桔槔中山移縹李度索擬蟠桃春色郊原迴朝光海岱高眼前今古興流覽意滔滔

其五

花重錦圍亭山環綺疊屏茶香清鶴夢琴弄託鴻臚東渚遙空碧南雲隔望青憑高一披豁步月返崑局

其六

高士下瑤輶清風坐野亭澄懷虛北海飲量隘南溟磊

石種魚法乘軒相鶴經未能垂朽腐且共養羶腥

其七

山翁黃獨酒羽客紫霞杯刻竹題詩罷開軒待月來
英鍾嶽秀華藻發天才昨夜星芒動文光炯上台

其八

虛懷無一事端坐息浮埃萬化由心出羣靈假氣來
飛觀感察龍卧識胚胎昨夜山頭雨還經地底雷

其九

逝水惜流年深山樂靜便煙霞如有待風月浩無邊混
沌遺形外鴻濛象帝先無端羲畫出萬古泄幽玄

其十

衣食寄樵漁山樊任卷舒無知同培塿有象表蘧蔭運
化天為轂成形地作輿明窓塵彷彿一擬託清虛

先民
二首

先民敦樸素末俗事驕奢重義多貧士為仁少富家綱
常吾不忝漁獵爾何誇德惡符冥感昭昭理有涯

又

韜光誠自愛守默更誰禁
老幼匡時願貧辜博施心
鼓刀無風望叩角有遺音
亦欲資章甫羞將短髮簪

題竹溪書屋為永嘉李華遠賦

一泓通巨海千幹掣連鰲
劒古金秋勁堂空壁月高
紅牙籤舊帙宮錦奪新袍
經史鄴侯富元非詩酒豪

寶劒篇

鸞子經歐冶望氣入豐城
池雄朝已化匣雌夜屢驚
琤琮

玉交花萼双血掩星明掛墓猶將信負背恐難憑

詠石

仇車方誤中神鞭驚血流人化懸知節羊變或難求
潤珠含露蘿碧月生秋方向君平問當念宋人留

所居 二首

江靜銀河接雲銷玉宇空門當五柳曲身在百花中
寶瑟紅樓近仙槎碧海通自全樗櫟質不是傲英雄

又

逸志惟求靜棲身不寄譁謳歌同野老鼓吹聽池蛙雲
氣連遙樹江光散落霞無因樹勲業亦是託生涯

採桑女

妾苦蠶無食郎自袖懷金向非照膽鏡對面不窺心妾
若愛黃金詎肯事籠筐黃金多人有君妻不採桑

秋夜即事

碧樹生秋思澄江散晚陰中天雲色靜萬戶月華深柳
甸環煙寺花樓出翠岑因循遠塵垢何必計山林

莫摘蓮花葉

莫摘蓮花葉摘葉子不肥莫採泥中藕弱蒂牽絲摘
蓮傷嫩刺採藕冒輕泥泥深妾沒足刺痛妾愁眉

寄展邦雄

大隱猶蒙垢狂夫乃叫閹諸侯初按節天子久臨軒
圖畫刁玄偽朝廷李勉尊十年江海客何以補乾坤

止海濱

去亂豈辭難寧親缺問安窮河知地遠望海覺天寬客

久通吳語童昏揖漢官十年家國願未擬尚盤桓

村居

三首

魯酒盈缸熟江花過眼新主家貧好客稚子笑迎人井
邑三農稔河山四望春故鄉明月在依舊隔兵塵

其二

元亮猶耽菊儀休恥茹葵宦情孤劍在國難大臣知自
顧同涇渭非關泣路岐五雲天日表拭淚望京師

其三

碧草迷荒壘春桑藹近郊驚鳥棲擇木容燕去辭巢禮
有朝廷舊貧多市井交苦無簪笏願不累子雲嘲

題張氏珍藏倪雲林小景

蘿月當溪屋松雲繞石亭瑟空閒玉柱劒古滅金星望
氣覘三曜開襟極八溟白鵝承遠寄翌日寫黃庭

雙桐生空井

翠葉承華露銀床拂勁枝泉將季月竭根分沃土滋具
實留丹鳳汲古緼朱絲時春還照影鸞交湛碧漪

故居燕

燕燕復燕燕，冷去炎來見。
認取舊時巢，識得新人面。
懸知廷火災，不是悲紅線。
得食勿喃喃，新人保深眷。

坐雨 二首

碧落羣峰外，衡門五柳邊。
頑雲猶障水，麗日欲經天。
問俗增愁苦，論兵憶歲年。
如何王猛計，寂寞祖生鞭。

又

落葉初飄瓦，流風故亂簾。
山虛雲抱石，樹闊雨交簷。
已

分黃雞社方膺赤雀占平生千古意牢落著書淹

有所傳

北闕皇風振東宮寶歷登雖殘周太廟足倚漢中興德
在仁無敵恩先勇莫矜好符堯舜治星象泰階微

曉坐

一夜雨聲盡繞溪流水深停鷺依竹實眠鶴戀松陰煮
石供真賞看雲契道心那堪小窻靜相對斗華岑

荅何伯度寄畫竹

自分得清曠秋空山月高坐閱滄洲客玉鈎金錯刀風
枝調鳳羽雲葉展龍綃待取侵天日連竿掣六鰲

偶題

水落見魚梁秋空數雁行浮烟欺弱草古木耐殘陽綠
蟻金壺滿花苔玉劒長誰能戀幽賞相對髣髯毛蒼

巫山高

彷彿巫山高雲雨陽臺曲妖鬼惑襄王夸辭耽宋玉風
高碧巖靜林遠浮烟綠月出秋冥冥喧聲夜猿續

題雲山便面為官仲肅賦

紫氣通函谷滄波接潁陰留雲三畝宅棹月五湖心
楚鳳歌猶寡齊牛歎已深因君持此曲江海覓知音

有道寫寄叔夏隱士

有道應知命無求足養和少憂聞禮晚貧恥受恩多尤
怨垂名義因循致亂訛周公頻入夢搔首意如何

澹湖熊氏幽居 二首

柏葉三秋嫩松陰六月涼
斷橋通水氣虛牖納天光
鮮

鱸銀絲滑香粳玉頰長過庭詩禮在何意問巖廊

又

鶴帳虛山館溫坡接野亭丹楓圍錦幃雪嶺出銀屏謾
倚將軍樹還瞻處士星飛騰好才力早晚破滄溟

奉寄宋季仲溫

不見宋高士頓亡書法奇風雲洞筋腕金鐵起蛟螭各
字詩尤簡逃名世愈知若君躬履踐豈後古人為

客懷

四首

踰月留花縣山寒晝不暄如何嗔眼暗祇是覺天昏玉
飯魚羹美銀酥膩炙繁歸心似流水百匝繞家園

其二

岸岸栽桑梓村村足稻粱近山民病虎入郭吏如商作
客非懷土思親故望鄉近途羸馬在猶得涉冰霜

其三

獨客懷親夜高堂憶別時久陰妨去路一月後歸期望
日青天遠看雲白雁遲平生家國願百折氣扶衰

其四

山雪明殘夜江雲薄曉陰寒莎輕綠淨凍葉亂紅深論
是潛夫癖瓢煩靜者心從來泉石趣何待此投簪

答宋倬

不為相思苦情知會面艱別從兵後數見似夢中看抱
璞非留滯衝霄好羽翰為農亦暫爾豈得久泥蟠

贈別天台柯山人

山人拂素手擊劍動剛風忽與行雲滅流歌繞太空天

橫銀漢白日爛海門紅望望茆龍遠星橋落綵虹

琴

朱絲結綠綺流水將高山抑節金徽裡飄響碧雲間曲
調古今異音聲理亂關急管繁弦出枯桐合久閒

贈別山石英

海客抱奇璞自言山石英清心事知已奴僕待公卿笑
盡一壺酒將為萬里行知君未豹變穢濁且潛名

草

綠草知人意，聯陰傍石闌。
霜根秋不死，劍葉夏生寒。
亂稼非同莠，無香愧似蘭。
皇天生植意，推分故相安。

春曉即事

柳重金盈縷，梅絨玉滿枝。
早雲將鳳鬣，斜月帶蛾眉。
人坐熙春裏，山開太古時。
衡門倚泉石，相過有佳期。

大垂手

翠袖雲初卷，金蓮步欲歌。
雪纖迴鳳態，酒暈暖蛾眉。
逐吹微淹氣，臨筇誤拂絲。
金谷休教晚，春風惜少時。

小垂手

寶釵輕按節犀筋半諧聲腰斜低舞燕喉趁小春鶯杏
粉塗黃潤桃臉畫眉清若弄叅差玉疑降許飛璫

上清道士方方壺為表叔冲虛天師作五圖皆
龍虎名勝庚戌過自山中表叔冲虛公命賦
詩

南山秋色

太古有蒼玉翬飛凌素秋一從開混沌元氣相和流乾

象耀圓景坤儀迹方周至哉歸有道尺素竭冥搜

鳴玉垂綸

至人撫玄運神功冥化機豈於得魚意遂以忘筌為天
闊山空處水流雲定時際此心手契物我了無疑

高風振衣

萬壑灑朝暝連山漲雄圖玄風鼓大漠天籟緣空虛引
我碧瑤琬因之紫霞裾飄然極八表游心觀太初

臨坡高興

金方山先生集 卷五
坡仙滑稽流壺子江海氣爰以一寸毫邈此百年意攜
鱸寄雅興夢鶴亦奇思慷慨展新圖高情見形似

湘水斗壇

瀟湘好雲水流月豔聚篁掃石仰碧落乾文星斗章一
彈龍唇琴再拂虎盤囊鶴唳冷風至飛步躡三光

還山居作

汲澗引滄浪看山詠鳳凰河圖雄地紀雲錦絢天章牧
豎淹齊相耨夫隱楚狂寥寥春草裏誰識禹餘糧

晚坐聞陳山人歌

谿樹晚陰合水亭涼氣多殘霞遙海色曲沼遍天河華
髮青冥士商音白石歌為君一洗耳三掬入溟波

晚歸別柯陳善

野服稱朱顏松谿看藥還披襟延皓月闢戶納青山道
在何論隱時危不厭閒惟應將隻履送客入秦關

白雲舍

二首 按古
詩原誤編

髻亂失慈訓所依仰椿齡游方忍盤娛惻惻吾在經晨

發陟遙岑東瞻際滄溟浮雲莽鄉園千里餘空青

又

慨此念親舍興恨涕交零死者吾弗逮生者無歸寧躑躅向周道終朝耿余情何當逐飛雲舒卷還柴荆滌瀝奉父志攀號過母塋餘生慰存沒庶用諧天經

江上曉懷

曙拂千峯斂秋澄萬木陰亂紅銷日上淨碧染江深紂世歸山意秦年蹈海心鍾期久淪落何許辨徽音

送饒彥材太原省親

思親西望日為國北征心
見子先家問懷鄉記土音
一門敦孝誼萬里竭忠忱
早使清區宇聯鑣返故林

挽黃先生

壯節文聲舊危時隱德優
子賢方祿養志大忽天游
司馬書猶在延陵劍不收
佳城將短些勒石表貞丘

題梨花枝上黃鸝語

恰恰金調羽盈盈玉拂枝
青樓傷曉夢碧樹感秋時
舌

巧含風潤花清照日遲章臺多彈射莫作後歸期

挽辛伯初

哀哀辛處士吾淚盡江東里
閑藥緣在朋儕交誼窮時
垂家有子道屈世無功
安寢兵戈裏幾人棺槨同

題畫 二首

老樹生秋氣遙山切暝陰
天空銀漢曉月黑草堂深
綺終難致巢由或可尋
黑頭家國願未愜畫圖心

又

草昧風雲起空濛宇宙分窮山週水澤無地著人羣落
落擎天幹霏霏障日氛九疑千古淚不是弔湘君

城山閣詩

危閣憑孤堞虛窻納萬山曉紅銷掛鏡秋綠淨飛鬟作
吏攜書往寧親待祿還南陽好孫子家慶老逾閒

春曉

虹梁棲弱燕翠柳度新鶯旭日千門曉春花萬樹明望
雲心更切居美道彌貞試待舒蒼翮翺飛四海清

春日即事

柳暗披垣深春濃小院陰啼鳥空啄屋困雀不驚林發
土看雄劍拘幽被雅琴澄清當日事憤排此時心

偶題四首寄張隱士

畊鑿此山中年深鄙俚通詩成教稚子酒熟勸隣翁霽
月金沙白流霞玉洞紅人情兼物理不是偶然同

其二

門跨猗蘭逕亭臨太乙池荷香侵盞竿竹氣淨簾帷虛

湛根無極塵勞息有為達生窮夢幻蕉鹿已深期

其三

白首淹雄略清心問大還露華滋紺髮丹髓駐紅顏長
策憂天下虛名避世間德公遺意在乘興鹿門山

其四

冷風生玉樹膏露潤芝田斧劙雲根术瓢探石竇泉浮
寰光載地玄象近瞻天中有高明士端居體自然

示從遊

虛無為道體剛健本乾行竅妙光中合心花靜裏明化
機由一氣玄感合三清寄語無鞅衆斯言廣度生

倪雲林小畫并自題因次韻道舊

尚友松陵舊方舟遡洑流雲林邀劒履丹壑閱歲脩葉
縣曾飛舄函關或駕牛惟餘毫素在清興滿滄洲

荅逸虛道者

靜定忘形體光芒運化工去來呼吸裏出入有無中抱
一寧非子乘虛不待風東華旌道要與我此言同

武當練山人謂余隱居有仙氣徵詩因感

四首

草樹青連野谿潭白映空林風琴自韻軒月酒誰同北
海襟懷裏東山氣宇中飛飛寥廓意心事託冥鴻

其二

投閒唯養浩觀化欲凌虛許侍中仙骨陶山相隱居匡
維虛碧落中正奠黃輿試坐茆齋裏春風席晏如

其三

六著黃眉老三參碧眼師分風縮地脈鍊石補天維夕

弄紫泥海朝食金幹芝鳳麟洲上路邀我折瑤枝

其四

朱鳥三秋見冰蠶九夏涼文犀裁卧簟紫錦織奚囊東
簡陳安世傳言郭密香五千言外意應不在文章

濯足圖為吳良材作

按古詩
原誤編

靈均滄浪清杜老八荒意千古有奇懷滔滔東流水長
風鼓松籟磐石淨如洗望眼際寥天南圖息千里

野老

野老無餘事陶瓶有宿糧
花開籬下賞酒熟甕邊嘗
覆屋黃茆煖搖風綠樹涼
魚羹飽飯後濯足望滄浪

懷空 二首

中和貧亦達莊敬行方成
天地氣同順蠻夷化必行
固窮安義命有道自亨貞
金玉身中物歸求已富盈

又

性迂耽已學計拙背人情
道大富千古心高貧一生
坦夷培曠達恬澹最清明
迹我熙春域家珍禁大成

挽李五松先生

題里承高義華旌慘禮魂詩書遺傳舍賓友散龍門仙
李仁風遠靈椿世澤繁唯餘五松樹掛劍表孤墳

元音遺響卷五

欽定四庫全書

元音遺響卷六

元 胡布 撰

七言律詩

崇仁義渡

水流南國渡皆同不似崇仁有古風
渡口亭田思遠業官家父子濟川功
蓬瀛脈絡三山合閩粵車書萬里通
豈但口碑傳盛事恩波涵泳表無窮

次韻崇仁鄧伯恭知縣見寄

南陽聲譽早蜚揚模範恢恢企素王大邑鳴琴遺德
化中天列宿爛文光雨添荻礪千林潤門倚春山萬景
張珩重新詩將逸操遠貽藟桂賦高堂

新霽後登城樓

長江脈脈瀉陰雷八表雲銷萬馬來南挹軍峰天柱壯
東臨閩嶠地維開典章遺物逃秦火草樹餘春長楚材
何必新亭淚如雨孤臣孽子豈凡才

學劍

學劍無成效，蠹魚空將然。諾重璫璣一，雙白璧酬知己。
萬兩黃金積，古書雜鳳雅。音希瑞世卧，龍迂計失茹。廬
宋人才辨，非無識燕石。分明玉不如。

延平

延平神物久淪亡，玉匣鉛刀耿夜光。自此東門無獵犬，
懸知去國有屠羊。寰中日月驅流電，海上風雲擁大
荒。向子素來諳曲調，不勝聞笛感山陽。

題方壺雲崖圖為后山湯導師賦

一片生綃萬里同高堂相對似山中崖堪作柱支寰宇
雲欲為霖布太空金碧光搖閨嶂日松杉聲韻虎溪風
陶潛靜裏觀心法蓮漏何煩問遠公

為史天然題方壺畫

半幅冥濛灑閨寥小山聚桂便堪招嵐飛絕壁千峰曉
日麗中天萬稜銷威鳳有巢饑啄竹祖龍無穴蟄通潮
披圖老矣滄洲思擬學天然樂一瓢

天馬圖為張希悅題

駿骨稜稜火鬣分鐵連錢映五花文江南豈有真龍種
冀北當空萬馬羣我昔天閑瞻步武人今墨素識風雲
披圖惆悵憐神物四海猶思汗血勲

山中

石林茆屋久相依半畝松陰護釣磯自有隴狐延上客
不教山鳥怪儒衣清江南下星河近白日西流草樹微
莫把柴關掩秋色恐妨孤鶴夜深歸

即景

霞綵星文綺疊層萬山金翠與憑陵川涵落月寒光早
雲淨遙天旭日升北極九門通虎豹南圖一息起鯤鵬
非關松菊招陶令本為蓴鱸返季鷹

臨清樓詩

樓在會稽吳越兩山間

高樓百尺俯澄灣落日憑虛縹緲間石壁倚風青鳥下
鸞簫吹月玉龍還霸圖猶在英雄夢雲氣俄連吳越山
何限興亡眼前事五湖煙水不相關

怡雲閣詩為夏簿煥賦

白雲城郭接郊簷寄迹何妨吏隱兼
總向宅邊栽五柳
還從畫裏覓陶潛
舊編翠竹裁長笛
新染紅牙刺短簫
且共區區眼前事
明時有道諒何淹

偶書

四月四日

綠竹簌簌護暖沙
清溪岸岸帶疎花
東風故壘迷雙燕
斜日方塘吠亂蛙
天地無情悲物化
江湖遺恨泣龍蛇
壯懷未欲憑流景
徙倚青霄淬鎔鉞

送人從軍

漠漠黃沙障曉氛
離離紫塞立中軍
三邊虎旅風雲氣
七尺龍駒錦繡文
齊國金貂加上將
漢家銅柱表奇勲
朝廷自獻平戎策
郊土終當驗爵分

去國

去國軒軒眷治隆
為農寂寂願年豐
投金空學屠龍技
拖玉深慙縛虎雄
斷石土花誰試劒
荒臺雲樹自歌風
微軀恨不凌霄漢
六合乾坤入望中

次韻輔州尹長民得消息天使罹禍

羣方凋瘵力無餘載毒登年古不如塞上新聞輕使節
江南故老望征車許身豈有空攘袂螯手何能遂補苴
望斷五雲瞻帝闕鬱葱佳氣接青徐

次韻張廣文奎得京師消息

八荒分壤列諸侯十歲侏儒擁道周玉壘秋雲浮霸氣
金鉦夜月起邊愁自慚劇孟成虛譽恥為燕丹作浪游
只合歸山袖龍劍吹簫醉卧木蘭舟

釋悶

千金裘弊黑貂寒萬里身嗟蜀道難鐵甲虎賁三窟外
玉京龍闕五雲端可憐陋巷空彈鋏不見都門有掛冠
贏得江湖雙白眼英雄只好暫時看

銅瓶

按古詩
原誤編

石床封翠琉璃冷苔花血漬鴛鴦頸迴鸞交綺闌京綃
疊字連環倒螭影瑤華碧井落夢房輓轡秋聲停夜梁
娉娥雲纖亂青淚薤圍裂金絲斷繫

老圃

老圃葵花曉露稀
北堂萱草映朝暉
一年春事愁邊過
三谷青山夢裏歸
聞道楚關無信使
中興漢業有光輝
黑頭不愧梁江總
已旁鷗波築釣磯

萬松亭詩為獨孤子雲賦

陰陰桑梓石塘斜
梧竹林深隱者家
素壁嵐光欺野色
春江雲影散簷花
萬松亭繞冲天鶴
九曲池通貫月楂
猶共老僧分半榻
崑崙峯頂鍊丹砂

曉起

金匱四庫全書
卷六
一并雨聲鄉夢殘越羅翡翠耐春寒遙知叔夜頻搔垢
底事逢萌懶著冠千古雲龍心總碎十年塵土鏡羞看
長風渺渺青冥闊惟待圖南臂羽翰

吳城卽事

浮槎隱隱逐飛蓬一脈潮來萬水通暫止行雲將霧雨
欲憑孤鴈駕天風千秋王氣麋臺冷百里邊聲雉堞空
今古興亡固如此青山何似愧英雄

自遺

自遺銅墨倦飛翰但拂塵埃著舊冠過雨山為磨劍石
排雲竹是掣鰲竿地窮大海三江盡天在方池一曲寬
何限胸吞九雲夢舉頭紅日見長安

淮陰侯墓下

殘羸鹿馬望夷宮亭長恩威起沛中肉食果能天下計
布衣何得草間雄恢宏漢業孤墳在覆戴齊王尺土功
回首五陵斜日遠行雲萬點亂秋空

近聞 二首

銅駝金谷剪蒿萊
文物衣冠暫却灰
天下魯連羞帝業
江南馮道竭奴才
九關蛇虎乘驅掃
千古雲龍即會垓
好向空山望牛斗
天文垂曜景圖迴

又

金臺寥落並燕山
王氣纏綿虎豹關
龍去鼎湖遺劍在
鶴飛緱嶺載笙還
興唐大位臨藩邸
復漢雄才涉草間
想見霓旌擁行在
五雲紅日照天顏

自從

自從先帝視同仁四海謳歌萬歲春
豈謂衣冠輕勦業不教蛇虎啖生民
百年興復乘元氣一舉存亡在大臣
夙昔賢才負雄畧早披天日展經綸

奉答空山處士胥叔丈

何必顏坏鑿曠冥誰從蔣逕倚空青
萬花潭水架溪屋九曲雲山環草亭
太角流光搖壁月中天幕翠點瑤星
枯桐刺有南薰曲彈向秋風獨鶴聽

雪

白龍鱗甲逐西流
碎剪瑤華夜不收
八面玉峯開素壁
萬家銀樹倚瑤樓
天連弱水三千里
人在梅花第一洲
幾擬山中尋皓鶴
又傳江上失浮鷗

訪陳通守介不遇

谷口獨尋陳
渚洲紫荊門
巷萬杉稠
靈山杳接虎龍氣
銀漢或同江海流
塵匣夜寒剌象劍
敗垣雲濕釣鰲鉤
元龍亦枉山城駕
誰卧乾坤百尺樓

久陰

萬山浮嵐生夕冥老樹撼雨龍鱗腥匝地雲煙連北粵
滔天波浪出南溟夢回孤枕家何在花落殘燈酒乍醒
一擬狂風掃陰氣明看旭日海門青

陪江漢常允小鳳岡登眺

麗日橫空淑景開凌風長嘯挹中台江如匹練排雲去
山似羣龍擁翠來三月煙花低草樹一培城郭小樓臺
王維更有江南思剎把新詩畫裏裁

題把釣圖為嚴作義賦

碧石嶙峋繞四周冥冥啼鳥數峯秋幾株古木干雲上
六月寒泉徹海流狂客袖歸搏虎枝脩竿坐擁掣鰲鉤
箕山本避唐堯讓笑指圖中問許由

山城即事

一道河流碧繞城累累雉堞表千旌殘民避虎當官道
甲第圖麟列將營驟雨來時白日黑游雲斷處青天橫
對此有懷如土梗不堪孤劒匣中鳴

俠烈

馬如足練過吳門杯酒相逢貴片言藥經利已無論命
汗血過霜不染痕一死何慚諾公子千金聊報飯王孫
冰霜萬里交河道獨騎西來惱吐渾

臨川吳道士清谿詩

青瞳仙子延陵孫鍊丹羊角之東原華蓋山當磨劍石
臨汝水合洗頭盆鞭龍或擊黃金勒馭鹿多凭紫氣軒
黍珠去地只十丈第一峯頭尋九門

綠竹

綠竹秋花啄野禽
鳳凰何處憩清陰
東山戀客蒼生老
南浦遺珠碧海深
計拙豈無投鼠器
力窮空有望鰲心
青冥善養冲霄翮
快覩剛風擊捷音

無題

湘江脩竹淚斑斑
惆悵重瞳去不還
黃道星辰環北極
蒼生霖雨在東山
長江鴟革風波遠
落日漁歌草澤閒
天壤相逢無限恨
強將軒豁破愁顏

觀獵

弧矢晶晶獵騎驍草中狐兔半魂銷
饑鷹自足隨黃犬
倦鶴何知訝早鷗東里歸心晴嶂遠
南天望眼楚雲遙
平生擊搏無才力不敢彎弓向九霄

冠山隱居為虞還淳賦

聞道年來只閉關紅塵不浣綠蓑閒
回光禱治周鄆鄂
隱水金花遂退還靜裏風雲雙白鶴
望中今古一青山
冠山境與清都接會躡冷然指顧間

古木幽篁圖為藍世康賦

掣鰲已長連雲幹泛海將剗貫月植培塿靜忘身世小
湖江寬受湫流斜鮮雲拂曙迷青靄涼月分秋到白沙
林下可能容杖履擬攜琴鶴過東家

答劉惟學見寄

半生鼻息吐虹霓袖握文光太乙藜江海十年歸震蕩
弓刀千里事提攜無端忌器難投鼠有計開闕恥學雞
顧我匣中雄劍在感君詩思啓愚迷

周柏壽隱居詩

學律窮經事已譌，鵞飛回首畏鰐羅。
潛蛟入海風濤靜，來鳳成巢竹實多。
繫下枯桐當雅操，山中藂桂擬招歌。
移文不愧重來客，千古高情意若何。

楊將軍竹所詩

將軍玉立萬琅玕，九夏清風草閣寒。
裁管試吹來鳳操，培根欲拂掣鰐竿。
南州文物交游盛，北海樽罍氣宇寬。
頗怪草玄終日裏，笑談帷幄四民安。

答楊恭叔見寄

抱璞燕然計不諧
傾財楚館事多乖
連城白壁憑誰售
百鎰黃金祇自懷
蟲蠹文章淹壯志
魚龍江海愧英材
感君高誼垂青眼
磊砢心胷得少排

題芝峯春曉圖

翠微清梵曉琅琅
靜裏鐘聲徹上方
金粟樓臺通海乳
紫芝雲樹發天香
道林神駿誇騏驎
康樂名山詠鳳凰
聞道玉機虛講席
西來意旨印東堂

廬山圖

路入匡廬望紫霄雲開紅日射山椒喫茶先到東林寺
送客不過虎溪橋斷岸水雷留宿艇近村煙火候歸樵
畫圖老眼成陳迹拂拭蒼松欲掛瓢

答吳志夫見寄

海內衣冠頌德聲八閩文物舊知名巢由有道全高節
李杜多才集大成白壁連城方售價黃河千古待澄清
蒲輪肯為蒼生起早使簫韶學鳳鳴

王若水畫筍竹桃雀圖

綠陰離落引遊絲景物春融萬暈遲老翠拂天無並幹
嬌紅照日有爭枝毫端點染成幽鳥淅右風流好畫師
昨夜小軒披尺素東風淑氣藹簾帷

次韻劉二紹見寄夢中之作

二首

鶴氅寬裁白袷袍冷風直擬太清遨揮戈駐景陽光合
舉手捫天步武高一氣化機號地籟八紘端倪析秋毫
鳳麟洲渚今清淺箕踞何妨濯翠濤

又

綠玉星冠紫綺袍片雲孤鶴事天遨
神仙子晉飛鳬遠
湖海元龍卧榻高方寸淵涵虛湛鏡
斗牛囊括影吹毫
自從識得先天學半夜中峯湧海濤

鶴仙枯生再用韻

二首

東平仙吏我同袍綠鬢歸休歎浪遨
經世文章江漢闊
閒居氣岨海天高胸中萬卷餘孤憤
身外千金杪一毫
自信天池窮渤澥鯨鯢終古駕雲濤

右奉東

又

閩楚歸來脫戰袍，列仙通籍友盧敖。
青天劍氣龍光老，明月簫聲鶴背高。
山水餘清分榻榻，風雲遺夢散吟毫。
如金肯借青藜杖，共陟蓬壺看雪濤。

右自述

又用韻二首奉答

虎盤囊映赤霜袍，獵獵霞裾稱遠遨。
星漢河源窮博望，魚龍江海識琴高。
崆峒老去詮龜策，閬苑歸來翳鳳毫。
自向漆園逢傲吏，耳根玄籥鼓風濤。

又

夢裏雲霞覲赭袍飛煙冉冉紫京遨瑀林碧玉三田暖
仙掌黃金一柱高化氣贅疣歸大幻剛風身世翼輕毫
甦枯不用天瓢滴挽取銀河瀉瀑濤

送安上人住資聖入覲

雪霽南天楚水新慈航北上泛通津呈橈已擬千人渡
見影方傳一脈真猊座香雲開梵宇龍河花雨覲楓宸
垂聲已慰藁林望資聖堂中萬劫春

慧明二上人皆次鄙韻見贈二首僕復用韻成

二首答之

高僧語默道機新每向迷塗示要津
總羨惠能通末著那知迦葉得初真
丹山鸞鳳依黃道玉殿簫韶奉紫宸

直指倘蒙登野老玲瓏巖畔碧桃春

右答慧上人照空

又

皎皎寥天壁月新流光大地燭迷津
已堪息影觀漚泡不用當臺覓鏡真
道上紗籠騰石馬眼中金屑睚楓宸
荊州此日神交意爛漫雲華却外春

右答明上人皎然

連上人主太平誠實願力金碧一新用韻美之
兜率重開此土新黃金樓閣是通津仁周世諦含諸有
體絕孤圓湛一真凡聖混融超法網君臣和合藹宗宸
會看萬善菩提果五葉葳蕤大地春

入理問所作

先生以高蹈有忤時政被謫

羅網還堪致鳳凰亭亭飛影企朝陽南圖已分添希有
西狩何勞獲不祥暗室撫心無少愧覆盆瞻隙有餘光
青冥我有冲霄翮奮激清風灑八荒

獄中元夕

丙辰歲

思親淚盡血俱流
綵服心違滯楚囚
燈月不孤囹圄夜
梟鸞何憾網羅憂
楚家亡狄延林木
殷子明夷顧匹儔
不有司空發冤獄
經天紫氣幾時收

次韻饒晟秀才見贈

二首

壯歲扁舟去五湖
浮雲身世卷還舒
空懷慷慨濟時策
底用太平封禪書
雲水閒情天宇闊
乾坤高榻世塵疎
掣鼉留得長竿在
縮手林泉學釣魚

右自述

又

飽聞龍卧蟄江湖天壤閒雲與卷舒祖訓百年高士傳
韋編千古聖人書多君武庫詞鋒勁老我文魔世梗疎
九萬亨衢當拭目風雲終化北溟魚

右奉
答

次韻余樵谷見寄

字南坡

青年儒素耿孤蹤師表賢才服事恭四海言窮羞說劍
千金技老困屠龍月來高樹軒居靜春到空山草木濃
同是隱淪知此意為君揮灑散憂悰

右自
述

又

羨子衡郊守定蹤神交道義意彌恭草深平野騎蒼鹿
雲滿清溪放白龍大角英芒遙拱衛少微光燄拂高濃
自從披誦新詩後悵望南坡企逸踪

右奉簡

還山

壯遊千里歎孤蓬中道知非返故藪浪有才名聞海內
祇憑生計在山中清明一掬神仙氣然諾千金國士風
不是久無仁及物卷舒心事與雲同

黎川李反正有詩表兄劉紹為和章徵余次韻

二首

江海棲蓬十載餘故林歸興在幽居
早聞綵服趨庭孝晚積牙籤插架書
泉水清甘剗竹引蒲田腴潤帶經鋤
新詩剩有超然志陡覺心胷磊砢舒

又

知君生計有贏餘藹藹桑麻繞竹居
林下交游還結伴山中種植已成書
苔磯春水誰緄舫蓆帽秋風自荷鋤

此意祇應同逸者寸心天壤缺

次韻黃文彥見寄 三首

達無恥在英雄後獨善身當道義尊敢藉文章鳴大雅
勉為賢哲仰諸昆隱居弘景甘棲遯著論虞卿厭坐樊
林下閒情天壤闊飛潛何羨北溟鯤

其二

經濟有時何憚晚文章於道未為尊皋夔王佐如心膂
伊呂師臣儼弟昆黃石蟻封隨土壤素書魚蠹在山樊

惟餘晉室清狂客漫有才華擬謝鯤

其三

相從泉石敢辭煩友誼從容德望尊
寂寂委金稱管子琅琅鏘玉識元昆
歌龍大澤君舒憤放虎窮山我息樊
自信南圖運騫翥風雲終古縱遊鯤

次韻劉二紹見寄感興近體

二首

眇軀中立體無為人道由誠亦有涯
常以恕心忘彼咎更于慎獨發吾私
風雲化感仁蕪濟靈雨亨貞澤溥施

天爵克脩歸有道名言昭晰豈吾欺

又

雲卧天行信有為昭昭立極渾無涯二儀孚洽元功溥
萬有熙和化育私消息氣機乘理運縱橫象緯柄文施
黃中濯濯期通直慎獨持端貴不欺

徵君 二首

山林鐘鼎兩忘情推分天和足養榮曾宇同仁閒宰相
文章有道富書生鵬搏一息周天運龍卧千江得月明

試鼓無弦彭澤操自然鳴鶴九皋聲

又

投分林泉遺世情自膺天爵被身榮
倫儕豈但齊三士
氣岸何如魯兩生
秋水襟期通汗漫
春風庭戶藹虛明
不嫌太古天然調
玄籥參差萬籟聲

村居即事

百折青山老樹村
一川雲氣護柴門
空濛矯矯垂天翼
江海滔滔活水源
蔬飯神清忘肉食
茆堂心穩傲華軒

英雄過眼迷荒土莫怪先生學灌園

宜陽道中

禾黍離離長野田風煙漠漠度平川樓臺萬戶居無主
租賦三農課有年鴟革沈浮將范蠡銀潢消息斷張騫
荒村蹉跎從迷逕還憶長安在日邊

我冠

我冠左袒白羊裘時向煙霞混道流動業無情風過耳
神仙有分雪盈頭飄飄身世雙龍劍蕩蕩乾坤一月鉤

攜取枯桐彈別鶴碧波如練楚江秋

鳳岡曉望

曙色蒼茫四望昏
搏桑雲錦眩朝暉
一襟灝爽凌天
宇萬里風濤息
海門大化範圍包
宇宙眇身中立柱
乾坤平生經緯陽
和力八表終當被
晏溫

感興 二首

元包混沌儼胚胎
清濁纔分化理開
一氣曲成森萬有
二儀中立具三才
修齊道擬前賢並
位育功由自己來

如此聖人能事畢就中義畫見深培

又

天位穹窿地勢低中間交媾育羣黎陶鈞汗漫乾坤洽
吹萬參差物我齊四海涵濡杯勺水九州埏埴彈丸泥
自從囊括成功用一氣循環表路蹊

予既為冲齋李先生賦南杲之詩威雨吳先生
偕冲齋聯壁而至方喜二妙過我適有事城
府茶話忽忽及二君子訪彥堂黃先生書樓

彥堂與予有衛國之約俱不果延欸相視悵
惘且期重來口占近體以謝并確前盟柬三

君子

雀啄空庭梧樹涼衣冠聯壁過林塘愧無魯酒延清話
謾有新詩賦草堂雄劍夙聞成許諾缺
輝光
汪汪叔度隣居好道義交從數不妨

再登鳳岡有作

南天漠漠楚江明八表光華際太清身在兩間為砥柱

望窮千里抱金城寥寥宇宙如無客獵獵風雲似有情
誰識謝公珎重意東山高卧計蒼生

次韻臨川許謙維翰見寄

二首

湖海才名白髮多歸休卅角舊行窩
寰區浩蕩推無濟胸宇清明足飲和
談道為誰揮玉麈趨時從自笑金鵝
相從愧我為疵癘珎玷由來尚可磨

又

木栢清潤稱藤槃草屋幽深卧榻安
琪樹拂雲丹鳳老

洞簫吹月玉龍寒著書未試圮橋履倣古猶裁許縣冠
此去瀛洲如可約秋風攜手駕青鸞

答洞陽道者

廣脩爭似學無為息得貪求是子時禍若許讓天受諂
福如可致道容私萬殊不別根茲在一念初萌影響隨
若到此途猶有步無中光景自家知

答中孚道者

二首

體為居宅四肢親神氣完全是主人內守謹嚴防物誘

中虛靜定發天真英英道萼三田煖拍拍仁風萬象春
光景本然如此好熙熙未讓葛天民

又

得失場中掉臂行陶然人我兩忘情虛懷應物非同俗
端坐澄心是養生姤就中孚成渾沌離消無妄見光晶
君如不識庖犧畫太極輾轅本異名

訪艾逸虛不值

二首

高士棲神石室遙獨騎玄鶴訪參寥長生寶笈繡金軸

延壽丹泉汲玉瓢一縷簫聲空裏聽千山雲氣望中消
無因把臂琴窗夕共話桑田看海潮

又

羽輶飛鷺適無方過客留延坐紫房玉盃瑤花新練乳
寶鑪雲篆夙煎香寰中雅致林泉勝世外高蹤日月長
遙睇青山覲神采冷風重約覲虛皇

對酒偶書

四首

高樹黃雲際遠天秋風鴻雁滿長川孔融北海無消息

安石東山有歲年夷散自應耽道味經綸誰復踵常編
塵埃回首知何限物色幽懷到酒邊

其二

氛祲冥冥歲月深鏡中華髮苦相侵非關志士淹忠憤
自信仁人蓄素心經緯有程稽往古英雄無夢慨來今
惟憑淺酌澆愁酒舒嘯東皋碧玉岑

其三

平生仁願及蒼生齟齬憂思殆玉成枯槁未甦霖雨在

烽烟暫息海田更博桑麗日光華近芒碭游雲乳宇清
且共芳樽澆磊砢南天昨夜泰階平

其四

當杯入手莫辭頻一曲清歌四座春世外雲天皆自得
胸中海宇遂同仁曼容不飲期成學崇質留行慰養親
猶待德輝來下日金苞並照羽儀新

次韻劉二紹過上藍訪友

二首

海嶠東邊眩錦暎幽尋應到上藍村山中酒凝流霞豔

席上人如美玉溫琴操九皋招獨鶴劍歌遙夜倒芳樽
東平佳句張公谷遲我留題次小軒

又

天上星辰識少微人間隱者芰荷衣千章老樹雲成幄
四面青山玉作圍肖象有懷求築野非熊無夢到漁磯
淮南不盡登臨興朗詠招歌策馬歸

偕表兄劉二紹訪友留飲求書因而有贈

二首

龍安豪客氣如龍秩秩賓筵異味重少室山林無俗氣

桐江水石有遺蹤能詩總羨劉公幹不飲休嫌邴曼容
最愛野亭梧竹裏牙籤文史足三冬

又

歸來一榻卧松雲徙倚簷峰對夕曛月滿溪山尋虎迹
秋空牛斗識龍文多君早負青雲器老我狂書白練裙
不是山陰逢道士可能乘興換鵝羣

次韻劉二紹菊節日與友興雲嶠登高之作

他鄉此日共登臺八表微茫望眼開江海歲時佳節換山

川雲物杪秋來風琴清宴驪朋集鶴綏高堂憶子迴
枉辱親親敦世好望雲慚舉菊花杯

遊正觀寺次劉紹韻

二首

黃花樵悴倚東籬碧草廉纖蔓曲池入室早逢僧慧可
來遊還共鄭當時山川佳氣寰中勝雲水高蹤世外期
今日上方隨喜去祇應祇樹採三芝

又

綠竹新編護檻籬清泉緩引放生池拈花已得單傳意

彈指何妨出定時
牧笛斜陽黃犢下
釣臺秋水白鷗期
相攜喜共煙霞賞
況有淮南詠紫芝

遊福山寺

老樹繁陰瑣間寥
飛湍百折寫岩堯
仁深苦海非無筏
度廣迷津亦有橋
薈蔔花林行處見
醍醐甘露坐來招
絕勝惠遠青蓮社
何必匡廬望紫霄

入山後復次前韻

鷲嶺風雲護閭寥
繡峰雲樹倚岩堯
人疑廬阜邀蓮社

礪似天台跨石橋陶令已諧開士約虞人何薦大夫招
遙瞻錫影迴蒼峽始覺鈴聲下紫霄


返棹圖

野人自愛住江干綠鬢歸來一榻安好樹成林多杞梓
狂流入海息波瀾欲從范蠡尋歸櫂更向任公覓釣竿
如此青山明月夜扁舟無那劒空彈

王鶴林造墨

聞道鶴林王墨卿松煙金屑乳瓊英分來羽客丹砂和

借得嫦娥玉杵成九域輿圖增煥發千秋紀載覩文明
憑君莫入編修館唇吻雌黃失正情



元音遺響卷六

欽定四庫全書

集部

元音遺響卷七

七至九

詳校官中書臣丁榮祚

助教臣常循覆勘

總校官原任中允臣王燕緒

校對官中書臣孫球

謄錄監生臣李炎

欽定四庫全書

元音遺響卷七

元 胡布 撰

五言絕句

子夜變歌

十首

劈碎短竹筇誰能居山峰峰生山中央磊砢刺心骨

其二

打殺雙鴛鴦催死到白頭白頭不肯飛守分合當休

其三

相思如江水東流不向西東流有迴轉相思見歸時

其四

春蠶掛門口抱絲到莊前鏡昏不見面施朱紅可憐

其五

儂愛芙蓉花如何拔花根花乾綴枝蒂老死守紅痕

其六

出門無所道尋龜卦憂惱見龜猶自可無龜當奈何

其七

蒲是無心蒲藕是荷根
蒲花見散亂蓮子結心苦

其八

汲井不能乾井深望瓶還
雖是轆轤轉手繩見泉難

其九

船自當風信失怨浪顛傾
牽絲繩大柁竿長難支撐

其十

愛歡人共道遇歡夢暫見
心是九疑山腸作車輪轉

墨菊

彭澤歸來後
緇塵點鬢絲
烏紗漉酒罷
掛在菊花枝

曉望

憑虛御旦氣
曠望當高臺
水白將天去
雲紅挾日來

把釣

八十鰈刀翁
風雲渭水逢
三千六百釣
一釣取齊封

自君之出矣

四首

自君之出矣
鸞鏡黯無光
不嫌紅粉污
持底試新粧

其二

自君之出矣不是怨空閨勲庸久未立封章那可齊

其三

君勞王事日妾事舅姑心別離千萬年恩情生死深

其四

憶別翻成夢愁寒預寄衣穿衣見妾面得信似君歸

夢中作

拂拭紫霞裾騰身白玉京天空雲亂冷夜半露華生

雪夜作

羽帳梨雲白虛窻霽雪明正當長夜裏只道日光生

聞并州旱

江水解牽愁愁心百折流憑將無限淚灑雨向并州

七言絕句

山中雜興

十首

山如奔馬水遊龍獵獵雲霞錦綺重一覽九州明望眼
天高日朗豁心胸

其二

壯心登涉不辭危俯愛熙和遂物私忽漫青雲生步履
便從西北補天維

其三

登山有屐水乘舟匹馬籃輿任遠遊磊砢滿懷艱步履
只堪青眼睇浮休

其四

歸來江上鼓雲和曲罷冷風振珮珂惆悵無人將逸操
鏡天秋淨月明多

其五

坐深清興滿林塘老樹陰濃比屋涼自足一卮澆磊砢
茆齋高枕到羲皇

其六

高天鴻雁翼秋清海宇紅雲去路明傳語鯤鵬今幾息
南圖空闊豈無情

其七

銀漢浮楂八月寒河源清淺共誰看鑿空攜石歸來後

從此天機不得安

其八

澄清真欲剪鯨鯢壯氣威稜力未疲更竭五湖翻四海
大甍枯槁洗瘡痍

其九

求田問舍拙謀為百事無營足養願賴有清明方寸地
靜如秋肅動春熙

其十

朗朗心田物我同相忘塵世與山中浮雲淨掃秋無際
璧月光華徹太空

遊仙詩 十首

眇軀天地寄蜉蝣囊括虛九位斗牛流目紫霞三萬里
冷風一息廣寒遊

其二

松花久服羽毛輕鶴上瑤簫弄月明拂拭紫宮磨鏡石
中天端坐待河清

其三

濟陰園客事蠶桑
草實充飢五色香
怪得繅絲繭如甕
織成星斗滿衣裳

其四

天高地下杳難攀
欲詰皇人漠泮間
仙境清虛塵世濁
深仁何事棄浮寰

其五

疎身徐步達清都
下視茫茫歷劫污
欲倒天瓢澆九域

人寰合返古初無

其六

霓旌閃閃絳臺微
緩引空歌啓玉扉
玄鹿脯延千歲壽
冰蠶絲織六銖衣

其七

遙遙閭闔綠金門
路近瑤林玉氣溫
北望鳳巢雲萬頃
拂天珠樹倚崑崙

其八

錦段囊琴憶楚明璫
箏幾曲受飛璫
八風從律諧宮徵
廣樂鈞天九奏成

其九

蒼龍天矯迎黃帝
白鶴飄颻道紫皇
自得金精和五氣
便將呼吸納三光

其十

玉貌長年浩養頤
金風午夜透簾帷
太虛一氣恢無象
元始非予却認誰

奉寄二兄

兄奉慈聞傍楚山弟勤王命客閩關人生忠孝行天下
千里渾如跬步間

夢中作

雲裾縹緲躡飛霞路入玉京仙子家
瑤堦長日碧闌靜
一陣狂風掃落花

虬鬚客

羣雄圖讖已多門餘子無過將相尊
不入長安經卦肆

白驃依舊向中原

明皇吹笛圖

綠玉昭華別有名自從吹曲戰塵生
三郎曾灑伊州淚凝碧池頭弔海青

絕句 二首

蘆荻花殘豆葉黃秋風八月雁南翔
年年墜露溥枯木老樹何心耐九霜

又

碧波千里漾浮漚畫槳驚飛入亂流莫漫水村煙霧裏
虞羅多在釣磯頭

久陰

江南冬暖不知寒長把晴雲帶雨看如今累月愁陰合
轉盼青天白日難

發澹湖

鶴林輕霧散餘寒翠竹交陰不礙冠十里曉風花作陳
亂飛梅雪擁征鞍

劉紹宅題芭蕉

碧玉盈盈翠袖寒
月明秋影盼青鸞
雲緘不展芳心嫩
怨向西風泣露團

再刻竹 二首

玉鸞雙引綵雲中
劍羽泠泠灑碧空
一曲昭華明月裏
飛璫無力任秋風

又

翡翠啼煙亂晚青
斜穿壁月過瑤屏
雙成九弄玲瓏玉

同躡金苞紫鳳翎

有贈

三珠樹底紫鸞笙
九弄參差玉譜成
青鳥不來明月冷
六銖衣薄怯秋清

月夜鳳山笛聲

月光如水寫秋空
長笛悲來萬里風
不是山高去天近
那因吹入五雲中

得陳堯咨胡璉書知故交存歿悵然賦此

三千里外書能到五六年間事已非今日徒將天下淚
倚天傾作萬珠璣

答孫行簡見寄

二首

自分青萍閱紫芒誰論鐵筆厲秋霜銀箏不是彈明月
悶向空山泣鳳凰

又

時來軒冕可能逃君有長才信所遭莫遣蒲輪恐山客
山中松桂訝旌旄

題畫

自從贏得五湖身白眼江干笑問津只道五湖風浪惡
狂流更有濟川人

返棹圖

歸來江上有扁舟相伴閒身狎白鷗棹向江東訪徐庶
無端談笑取公侯

蒼松圖

綠竹如雲草閣寒門前流水五湖寬長松自挺山林氣

莫作當年柱石看

有感

雲林遙隔鹿門山
長路囂塵倦往還
自信龐公遠城府
不因名姓在人間

題畫 二首

華髮歸來著素冠
碧山秋興楚天寬
自從閒却風雲手
江漢經綸理釣竿

又

綠水青山草澤春悠悠舟楫寄閒身五湖淪落無知己
畫裏鴟夷識故人

丙辰十月初五日發龍江

羈人得遣如承檄日暮登舟似到家烏鵲定傳天外喜
慈闈今夜占燈花

畫馬

當時造父為誰容變幻風雲有類從一自穆王窮轍跡
天閑何處覓真龍

墨菊

陶潛宅是右軍家移得秋芳共歲華
金質曉凝煙霧重
東籬爛漫墨池花

紅梅

半酣姑射臉烘桃玉笛風清絳雪高
買得鮫綃重著色
猩猩血染赤霜袍

題二牧死節卷

栢君壽疊子初

國士從容盡節秋二公忠倡起遐陬
三山明月清漳水

一樣丹衷萬古流

天鵝

斷岸蘆花撲浪腥
一雙棲泊向長汀
鵞飛未欲凌霄漢
豈傍蓬蒿畏海青

富春垂釣圖

軒冕泥塗本異名
論文一宿去天庭
十年老我江湖夢
祇向圖中覓客星

題畫

江上琴聲水面風
空山流響振霜鍾
平生心手南薰曲
鼓向潛淵起蟄龍

牛自牧畫竹寄馮宗泰求題

蒼鸞七葉紫金苞
露冷歲蕤憶舊巢
分得一枝來嶰谷
掣鰲竿上化龍梢

方壺畫竹寄周知州

太守題封金瀝沆
壺仙折寄玉琳琅
鳳翎幾葉瀟湘露
留作高軒九夏涼

送聶尚文赴選

衛國諸孫國士風
九苞華采麗蒼穹
都將久蟄林泉志
散作為霖澤物功

題方壺半窻風雨竹

折得琅玕幾葉青
冷風入手翠濤輕
金苞不展湘蕤露
灑向秋窻作雨聲

題方壺畫江雲渭樹寄黃子邕

壺子慇懃畫裏詩
寄來工部慰相思
都將魏闕風雲意

散作湖江汗漫期

送黃伯章應辟

潁川遺德懋諸孫
廊廟璫璵白玉溫
此去挾書千萬乘
好將忠孝繼賢門

陳本初應辟

昭代才華出潁宮
元龍豪氣拂秋空
致君堯舜須儒術
好建良臣濟世功

棲雀圖

二首

章臺羅綺錦成團
花柳繁陰有彈丸
何似空山荊棘裏
春風穩借一枝安

又

跳出穠芳萬錦團
暫棲榛棘避金丸
上林無限間關者
不似山樊夢寐安

次韻孫作大雅思歸四絕各述已志

學得條桑種薄田
竹溪茆屋鳳山前
青雲長得三珠樹
碧落飛來一道泉

其二

浩蕩乾坤寄此身
芭蘆蝦菜戀江村
自從天爵拘名節
只合經書遺子孫

其三

老去虛心將勁竹
饑來返哺愛慈鴉
忠貞孝友無消息
惆悵南天白日斜

其四

壯髮飄蕭四十踰
羈縻何意問陶漁
為屠白額除民患

每掣金鰲備饌厨

次韻倪雲林自題竹石小畫

筆底天章迥不羣
寫生羞說李將軍
空林著得林貞魄
笑殺師雄媚縞裙

題風煙雪月梅

四首

翠羽聲殘夢覺時
昭華玉瑄曉參差
瑤林昨夜春寒淺
貌得梨雲不受吹

其二

羅浮仙子黯香魂
筆底陽和水墨痕
多事縞衣蒙玉質
三千弱水又黃昏

其三

玉屑盈盈玉瓣低
陽烏東上醉如泥
寫真好似楊生手
瑤樹千秋翠羽啼

其四

瑤葩萬樹俯清江
宵魄寒回玉笛腔
不是金波吹潋灩
肯分清影到書窗

題宋好古橫披竹

鳳翎蕭瑟吐寒芒
碧玉分陰剪剪香
試啓橫窗看月色
清風天籟起瀟湘

題錢舜舉折枝桃

五陵春色巧胚胎
桃李家山取次開
不惜月中攀桂手
寫他長者折枝來

漫興

四首

石林環抱白雲村
曲沼潛通活水源
莫訝山中富葩藻

春風萬彙藹蓬門

其二

家住雲林結翠微
故交寥落過門稀
滄江夜色樵漁罷
水月虛明送客歸

其三

學得鴟夷世外遊
雲濤天壤寄安流
五陵書劍隨行李
頭白江湖一釣舟

其四

江海風塵睚壯圖故山生計在樵蘇年來金土皆同價
辭賦雖工肯賣無

題出山便面

琴劍西遊幾日還秋風足馬度江關石門松籟休回顧
不為蒼生不出山

蕭翼賺蘭亭圖

唐皇智取誠何在蕭翼諛成計已深傳笑畫圖因玩物
君臣千古戒欺心

昱方畫寄無盡無盡轉贈遠峰遠峰求題

昱方佳製寄傳翁持此瑀瑤貺遠峰不是無言一轉語
風雲毫素起蛟龍

三友雙雀圖

三友自矜霜雪操雙禽穩借歲寒枝
騫飛未欲當陰慘
共待陽和布物私

九龍圖

三首

陽九亨貞德正中甦枯澤物瑞年豐
祇應毫素圖神器

不遣風雲訝葉公

其二

寰宇無塵海不波
忽然陰慘出羣魔
漁民損物成何事
周處雄才世上多

其三

天池潛躍久無聞
用九非時豈有羣
似是筆端千古意
摩挲老眼識風雲

題畫

冉冉行雲翳太空竟無霖雨作年豐
毒龍不挽天河水徒使蒼生怨化工

雨後泛舟有作

二首

陰霾亘日黯愁寒深藉狂風為掃殘
此夕月涼蘭棹穩寥天雲氣共誰看

又

雲消四裔淨無塵忽漫青天萬景新
驟雨狂風不知處五湖明月屬閒人

松谷詩

好從巖穴養貞姿大厦傾頽豈易支此去化龍蟠后土
千秋西北障天維

元音遺響卷七